

本朝分省人物考

人物考目錄卷之一百一

山西潞安府遼州  
澤州大同府

栗恕

杜斆

李翀

趙泰

劉昭

李之瀚

李昱

趙偉

李紀

劉龍

溫景葵

任寰

盧學禮

李鐸

李文輔

李達

李濬

王文

阮勤

劉潔

楊能

韓錦

李昇

白聚良

李新芳

薛朝胤

仇時濟

大同府

石珣

劉文

孫祥

郝杰

郭容

林椿

劉伏玘

孫逢吉

宋經

李從正

張汝舟

遼州

高魏

王雲鳳

王佐

澤州

楊砥

茹太素

張曷

侯璉

楊繼宗

田鐸

張璉

王玟

孟陽

郭璠

郭璠

游居敬

劉虞夔

常倫

劉東星

王璉

原傑

宋甫

常軌

宋鑑

吳茂

李振民

張黻

王翔鳳

張段  
銓

申良  
何廷魁

本朝京省人物考卷之一百一

山西

潞安府  
遼州

附澤州  
大同府

栗恕

栗恕潞安府長子縣人洪武七年以縣學生起貢入  
國子監授刑科給事中十五年廷臣薦其才特試戶  
部右侍郎十七年陞試戶部尚書八月定各處鹽工  
本鈔十八年七月奉 命行兩浙京畿官田收稅糧  
鈔其天下有司官俸米每鈔二貫三百文准米一石  
其酒醋諸色課若有布帛米穀等項俱折金銀錢鈔  
除量存各司府州縣祭祀所用餘各令該司局等官

親齋具奏有司帶辦者差吏管解俱以次年正月起程又令各該有司復設糧長以民力稍多者克當其各賦役必驗丁糧多寡產業厚薄以均其力至是又命有司第民戶上中下三等爲賦役冊貯於廳事凡遇徭役取驗以革吏弊時以農桑起科大重百姓艱難今後以定數爲額聽從種植不必起科以甦其力恕宣勞于國屢見推任未幾上疏求罷歸里

杜 敷

杜敷潞州壺關人年十五善屬文勤慎好學精通易書詩三經元末省院屢辟不起入國朝洪武十三年

以尚書范敏薦其學行特勅徵之北至京陛見

上諭曰昔有耕莘者爲政社稷永安築巖者在朝君仁民康斯二賢叠出於殷商致君六百年之大業是賢者雖處同出異其忠君濟民之道則一朕政未施訪近臣而求士召爾等來朝命爲四輔官兼太子賓客位列公侯都府之次必欲均調四時德合人天卿等慎之同安盛世及蒞任上又諭曰受斯重任朕與卿等民生係焉可不重乎且卿等昨爲庶民今輔朕以掌民命出類拔萃以顯父母豈不天人交慶哉未幾命敷司夏季三月皆上旬十日每入見賜坐講



論治道 上嘗幸第及屢賜珍饌襲衣又嘗賜遊東苑 上親與賡詩後以老病告歸卒于家

李 翀

李翀壺關人洪武初由薦舉擢典籍十五年十一月陞爲侍講學士 上賜之勅曰昔有唐天下歲和時豐無乃弘文館之設有方任館內之事者內相協贊以致遐邇來庭外戶不閉今特命爾翀居是任尚期文同韓柳勳比房杜以昌治化十七年 上與翀等論武事翀曰用兵重在任將 上曰任將之道固重然必任之專信之篤而後可以成功若唐憲宗用魚

朝恩肅宗用吐突承璀爲監軍諸將掣肘以致敗事  
者是任將不專信之不篤故也矧曰惟 陛下聖明  
深知其弊 上曰將必擇有識有謀有仁有勇者有  
識能察幾於未形有謀能制勝於未動有仁能得士  
心有勇能摧堅破銳兼是四者而後可以成功然亦  
在人君任之何如爾十八年出爲浙江右布政使尋  
以老致仕

趙 泰

趙泰字熙和潞城人登永樂癸卯鄉舉明年試禮部  
中乙榜當授教官願入太學肄業尋歷政憲臺擢常

州府同知廉以持已惠以及民勤以蒞事凡利民之  
務必爲之開孟賁得勝二河作魏村閘及郡城外東  
西二橋功成而民不勞歲旱齋沐禱於城隍大雨霑  
足蝗飛至郡焚香告天悉飛去夜夢城隍祠神指一  
女人云當辯其冤迨旦一婦人訴被誣當死泰以其  
事可疑乃廣詢博察得其情實事遂白婦得不死奏  
減常官田重租修學舍課諸生進學其善政甚多秩  
滿奏最天曹會河決東昌特陞都水郎中往塞河旣  
興功時尚書周公爲侍郎巡撫南畿總蘇松諸郡糧  
賦以賦重大薦泰協同都運詔從之泰任事以勤勞

率民徵輸有法不懷其下吏民仰賴無何以疾卒春秋五十有二泰爲政公恕平易不尚刻覈所至有聲稱焉時同事周公深加悼惜

劉 昭

劉昭字克明號約禮潞城人穎敏秀拔登宣德間進士第觀政刑部練達治體爲大司寇所器重正統辛酉擢給事中於南京封駁章疏一秉至公糾舉六卿不避權要時宦官監收倉糧民被其害昭卽上疏陳言弊用以革皇城門闌出無禁劾奏嚴其稽察直聲烺烺重于兩京正統戊辰用大臣薦陞知臨洮下車

之初學官之頽敝者重工修葺以勵人才田野之未闢者令民開懇以重農事郡治舊缺鐘鼓二樓捐俸市材增創之不越月而成民不告勞蓋其興廢補遺靡不類此初郡科目乏人蒞事以來恒加獎勵故自庚午至丙子士領鄉薦者彬彬輩出景泰壬申歲大旱民缺食流亡者衆百方撫綏旣設法勸借以賑之復割俸煮粥以濟之時濱死而賴以復蘇者不可數計屬邑民訟不能決者一言折之不情者往往羞赧自服故刑獄多所平反民以不冤郡有歌之者曰野有饑民惟侯活之我有田疇惟侯闢之古人謹獄惟

侯平之有此三惠孰不懷之聞者以爲實錄云敏官  
七年不赫赫以立威不皎皎以沽名惟砥礪名節勤  
恤民隱曰吾惟求盡其在我者而已故其没于官也  
環千里內外無間軍民皆悼惜之曰安得撫我復有  
如吾劉公者耶春秋六十

李之瀚

李之瀚屯留人宣德乙卯鄉薦成進士出知華亭歲  
惡民流加意招撫漸以復業還貴戚所侵民田徵拜  
御史按陝劾賊吏汰宿奸郡邑吏望風懾伏擒巨猾  
之肆毒一方者寘于法扼鎮守貴璫不得恣其惡縛

終南山妖僧市斬不以稱亂故株連無辜陞江西副使遷按察使歷布政使擢副都御史董漕政淮南守結逆璫貪愎虐民劾罷之會藩王由運河之國恐其妨運奏令各船分行兩河得以不擾徵入爲左副都御史晉南戶書時外守備縱家人私攬歲課不以輪官收繫獄宿逋始完尋致仕歸

李 昱

李昱字文昭號慎齋世爲潞州人天性剛毅篤於爲義慷慨自許動以古人爲法領宣德乙卯鄉薦卒業太學謁選授光祿寺署丞正統己巳扈從北征陷于

虜庭虜人欲用之不屈臨之以刃乃曰主辱臣死今日顧吾死所也遂遇害景泰初進階徵仕郎廕一子入太學褒以勅命子淳歷揚州推官高堂同知孫堂以鄉薦令遵化爲苑馬寺丞

### 趙偉

趙偉字士奇號愚菴潞城人正統戊午鄉試高第丁卯入選銓曹拜河南開封府同知綽有政聲時少保于公撫臨其地嘗奏保衛輝懷慶知府未及行景泰辛未接丁內外艱至乙亥服闋復改山東萊州府如前職萊民間知咸舉手加額私相謂曰今得賢父母



矣偉蒞政如在開封而心益勞功益著聲益宏甫二期用廷臣薦陞青州府知府已卯夏旱飛蝗入境率屬虔禱於八蜡之神已而甘雨大澍蝗種盡斃歲大熟越辛巳政通人和公視府第及廟學壇壝多傾圯乃設法措置拓而新之官不知費民不知勞青民有一家坐三人以死者憐其絕後活一人以延其嗣忽一夕夢其父祖匍匐而至謝曰延吾之後公之惠也吾亦惟祝公之後繼續而益大之耳在治八載罔倦於勤成化丙戌適當朝會之期自上疏乞歸旣得請優游桑梓日以教子耕讀爲事每歲時自鄉飲外未

嘗一至公府見里中有貧乏者賙給之婚喪有未舉者資助之如是者幾十載一疾奄逝時成化乙巳享年七十有六

李紀

李紀字朝振潞州人中成化乙酉省試授故城知縣故城俗昏娶論財家貧男女或壯老無一匹者紀至盡召諸里耆而立之約自今昏娶論財者法弗貸于是貧家皆得匹縣故有官地占于豪官莫能奪紀按文責地豪卽出之還官乃歲以地出給貧民緩其征秩滿擢錦衣衛經歷六年擢臨洮府知府臨洮雜番

桀難治紀曰不操法令無以遠惡也乃治其豪侮法令者益尚嚴明吏民人人無不惴恐無敢冒文者其後人人乃得自緩不至陷害郡大治守日與僚張宴坐花行酒吹笙竽時與衛官擁旌旄伐金鼓出城行射較獵然人人亦喜觀曰太守甚樂孔武弗擾也洮水將壞城洶洶不可渡守登城指某山石可隄某山木可梁乃築石隄水去城三里伐木爲八舟梁之在郡剛方自持不能恭事上官上官多畏害之都御史有親故過府販綿葛求守令于民爲倍利焉守曰此何以令民吾爲民守終不能爲都御史親故販而

董利漁民將報之其人懼而遁譖于都御史都御史  
彈守降爲長蘆運司同知或勸之曰運司財利府也  
人無有望身名陞者公又貧獨自爲計邪弗聽益峻  
自潔嘗赴京諸大商賈人張具于路遮馬留食徑策  
馬趨過之叱曰吾食汝邪于是御史嘉之上其名曰  
居可貪而弗污者今見有李同知爾居嘗曰寧死不  
污寧貧不貪故爲孝廉時以能却金不爲人干請蓋  
其方廉志性不移如此由長蘆擢福建運使一年乞  
致仕歸曰吾何以弗已邪世之見用者不附勢率通  
滑爾方者貶廉者塞吾無用矣吾何以弗已邪別號

默菴晚又號漳東主人好吟咏著有默菴集既疾會其親族子弟曰吾年止今日吾平生儉人以爲嗇吾無人以爲有夫誰知予者遂出篋笥開使共視之惟圖書衣幘而已

### 劉龍

劉龍字舜卿號紫巖襄垣人祖浙江副使父鳳儀以進士爲刑部郎中嘗晝寢夢一紫衣人以朱盤捧書排戶而入曰上帝以此賜汝翌日龍生幼穎秀不凡十歲號能文筆鋒警銳弘治乙卯舉山西第二人己未中式禮部廷對擢一甲第三人授編修充經筵

講官與修 孝廟實錄正德丙寅丁外艱歸起復領  
職時逆瑾用事改授兵部主事尋改吏部考功司員  
外瑾誅詔復原官陞左春坊領司經局修玉牒講官  
如故癸酉主順天鄉試陞侍講學士與弟給舍夔同  
列華階嘉靖改元命教庶吉士與修 武宗實錄再  
主順天鄉試陞禮部右侍郎賜織金羅段紗絹衣一  
襲冠帶靴履副之值母喪加賜祭葬服除陞左侍郎  
日講如故久之陞南京禮部尚書廕一子國子生尋  
陞南吏部尚書壬辰內察悉心訪覈去留號爲精當  
改南京兵部尚書叅贊機務濟川諸衛快船工料諸

潘司率不時給歲請勅印差官經理錦衣衛沙洲湖塘之利乾沒不貲奏遣其屬偕督屯使者勾稽如法黃船軍役頗多富室巧相影匿不歸伍者千餘人所耗月糧歲且萬石乃躬爲編定往返率以三月爲限歸塢還營各有定期勞逸旣均而疾病亦除矣江北飛熊等衛屯所地曠人稀鹽徒肆行鈔暴奏選三衛屯軍舍餘列營操備以都指揮一人領之而盜賊衰息他如修兵政以肅軍令崇武學以通將材罷龍江五關守把之中官稽橫海五衛欺隱之蓄謀凡有裨機務者無不畢力爲之有旨召還北京請罷益力

上允致仕賜驛以歸歸則時與親知觴咏紫巖山水之間意殊樂之節鎮巡臺交章論薦詮部擬起用而竟不果出嘉靖癸丑以病卒初邑人見大星隕城北赤氣亘天祖塋草木皆悴咸爲龍危至是果驗然年已七十有八矣

溫景葵

溫景葵字汝陽大同舉人也其文行爲鄉表以嘉靖壬辰進士令長山擢御史守蘇州並有治績嘉靖庚申邊事孔棘兵道初設乃自霸州道移任朔制運籌詳審精密任四年政兼百善事愜人心功垂世軌如



穀殘傷農立爲糴貯法因軍餉對支掠害商人立爲  
入倉法因將士重冒行糧濫費立爲稽查法因後府  
催殘徭坑衛職疏准爲徑解惜薪司法修建昌營劉  
家營石門寨半壁山等城爲邊疆保障未再閱月新  
郡城樓七座處置有方財不費而居民不擾爲重鎮  
偉觀遴選庠士館之孤竹書院聘師豐廩嚴程課如  
親子弟然故一時登巍科者皆出其門約軍衛而寬  
嚴並用遇士夫而恩禮兼隆疆圉肅清小民安堵加  
叅政俸癸亥之變總兵陳沒督撫重譴朝議難其人  
科道交薦特擢都御史巡撫順天其惠澤及人者尤

深居三載告病歸里以疾卒于家

任 寰

任寰字應乾號復菴潞安人嘉靖甲辰進士知廣平  
調劇沙河丁父憂起復滑縣沙河當南北之衝疲于  
役甚首爲省厨傳罷誅求以次釋冤獄毀淫祠凡所  
興革必視民所便其治滑如治沙兩邑皆祠祀之陞  
同知蘇州府時倭夷寇東南所至民與吏輒奔以潰  
寰獨訓練所統民兵與之力戰而躬介冑策馬以先  
之自書其姓名於腹背手足曰死戰吾責也茲用以  
識庶得收葬焉聞者感泣又與其兵同寢食或連日

夜粒米不入口或露宿草莽植立泥淖中所得俸值及諸上官之牢醴悉分與其兵由是兵益日奮敗賊于上海之八團方戰時寇拔劍直趨擊寰賴庖人以身蔽之獲免而猶身被三創旣而守太倉以積勞疽發于背其子爾孝請還郡就醫叱曰吾誓不與賊俱生幸吾疾愈而賊滅當與若共享太平之福否則有臣死忠妻死節子死孝而已歸以是語爾母會報賊至遂裹瘡出海擊之怒濤如山南人習舟者皆震眩失色寰意氣彌厲手劍麾舟師搏之賊大敗俘斬百餘未幾又敗之陰沙敗之保山敗之南沙捷聞擢山

東僉事備兵蘇松賊又犯蘇民爭走入城聚保門鎗  
不得入哭聲震野寰曰城池視百姓重等耳柰何棄  
之亟命啟門曰賊入者某請任其責明日賊至敗之  
封門復至復大敗之賊遁論功進副使賜白金文綺  
廕一子潞州衛正千戶世襲丁母憂部使者及諸士  
民連疏乞起詔責以大義而特贈其母以慰之不得  
已受命明年倭平疏乞終制詔報可陞山東參政以  
旌其功竟以前勞積瘁疾作遽卒享年僅四十人莫  
不悼惜之

盧學禮

盧學禮字立夫號趨庭潞城人少負異資疑然魁岸  
爲博士家言敏捷有法度博聞強志名稱超然隆慶  
丁卯舉京兆第再上春官萬曆甲戌將復詣試而值  
母恭人病或勸盍且趣裝愀然謝曰安有親臥牀簣  
而千里赴名有如闕于一訣何以爲子竟止不行頃  
之遂丁內艱丁丑北上成進士第筮仕南召令踰年  
聲績大起天官偉其才望未幾以外艱去職服除補  
東阿浹歲召爲兵部武選司主事再遷車駕郎中擢  
兗州府知府已復丁繼母憂服除補守襄陽會播州  
兵興供億徵輸多所勞瘁又以權使暴征爭不能下

方有歸圖旋晉陝西副使兵備洮岷聞命欲謝不往  
所知咸敦迫之爲一持節蒞鎮又與勅使爲忤竟拂  
衣歸歸不數月輒病病不踰歲竟卒學禮寬然長者  
也貌樸而偉坦夷無城府接人辭色雍雅情義藹然  
凝重不佻口若鈍于辭然于世故民情談說娓娓曲  
中肯綮雖竟日夜不倦居職廉儉無所紛華取簡靜  
寬和爲理挈綱疎目耻言苛細而比讞精詳綜理縝  
密猾胥不能欺也事使之際不爲崖異而動有執持  
亦無能撓其法者蓋純然古循良吏矣南召僻小邑  
然在山谷陜塞中多礦盜日夜拊循小民樽節裁省

與之休息因以嚴飭烽燧盜不得發境內無虞東阿  
治當孔道其衝倍于他邑不滿朞月政通人和誦聲  
交作赫然最魯中充爲東方大府方制二千餘里介  
在兩都之中稱望郡以治邑之政移之于守風聲所  
樹二十七城罔不蒸蒸庇在宇下兩臺諸使以疏言  
治狀且十餘上天官考其治績表爲憲副候命未下  
遂以憂歸故再補而後遷位雖尊顯于資地稱淹久  
矣猶以不能爲容拂衣而老仕林惜之而里人當其  
卒識與不識皆爲嘆息泣下至空市走弔則忠心誠  
信所感深矣

李鐸

李鐸潞安人才識通敏以國子生任江西僉事有任剛果不阿得風憲體

李文輔

李文輔潞安人以國子生歷任山東濟南府知府在郡多善政以才幹馳聲

李達

李達屯畱人洪武中貢士任福建道監察御史秉公執法立朝稜稜有風望出按外省軍民咸服

李潞



李濬襄垣人永樂進士拜兵部主事陞保定知府尋  
調河間所至有善政休歸鄉里以詩酒自適高枕柴  
門怡然自足所著有雲谿稿瀛海集

王文

王文潞州衛人少砥礪行履端潔正統間舉人知邠  
州舉無秕政以績最陞漳州府知府調河南平涼兩  
府所至皆上德輕刑民立碑頌之後陞浙江鹽運使  
致仕

阮勤

阮勤長子縣人性嚴毅篤學研精經史景泰間進士

石琄

石琄大同府應州人領宣德己酉鄉舉庚戌入國監  
登癸丑進士觀政戶部收通州倉糧草去宿弊正統  
初授禮科給事中擢知金華府鄰郡括蒼盜起出兵  
擊之掠酒食殺人於郭外琄執斬以徇始帖然就部  
伍以去民避盜來者老稚扶携千百爲羣皆乏食非  
開官庾莫能濟上官疑莫敢曰彼迫于殍死則亦爲  
盜矣擅開庾與迫民爲盜罪孰重我就其輕者得譴  
無悔也開以濟之歡聲雷動蘭谿吏徐世揚浦江卒  
王猛烈皆爲其邑患苦置之法衆以寧謐母憂去任

都御史軒公輒以助弭括蒼盜饋足守固民怙其仁  
兵懾其義爲言于朝得旨起復還任尋陞福建右  
布政使時所部內沙縣盜始平增築城以鎮其地城  
事悉以委之計工匠度財用兵民合力近遠輻輳城  
完以期而無告勞者屬郡稅比歲多逋聞珣當督稅  
民咸相告來諭曰石公不苟取于我無以此累之生  
平以廉著稱福州守雷礪以當入覲持金往贐亦峻  
却之他可知也上聞其賢以爲吏部左侍郎未幾  
遂召爲禮部尚書靖恭於位朝望益孚甫三載而卒  
得年六十有四

劉文

劉文字宗華大同縣人以鄉貢士選習夷字舉正統元年進士授中書舍人仍譯字十四年扈從北征還陳邊務數事景皇帝召入便殿面問之尋命提督四夷館丁母憂詔奪情任事陞吏部郎中天順初以迎駕陞右通政成化五年再陞右通政九年命偕都督李文撫安西番三年而後歸因乞休致至家卒訃聞命有司致祭文在夷館最久熟知夷情屢有建請多所採納云

孫祥

孫祥大同府大同縣人正統乙丑進士擢兵科給事中十四年土木之變超拜都察院右僉都御史鎮守紫荆關北虜犯順被賊射死

郝杰

郝杰字彥輔號少泉蔚州人父銘爲監察御史按滇南有能聲杰以嘉靖丙辰進士授行人選御史按貴州丁父憂歸服除補河南道按順天入掌京畿道會新鄭高公拱再相杰嘗露章斥其器量不堪端揆出爲陝西副使遷江西叅政改山東丁母憂歸服除陞浙江按察使尋轉左右轄拜右僉都御史巡撫遼東

其年虜十餘萬入寧前督輕騎擊走之明年春虜悉衆犯遼陽督諸將追出塞斬首虜三百八十餘級鹵獲器畜以千計捷聞詔賜白金文綺廕一子國子生其冬虜二十萬騎入河東分遣諸將禦之斬首虜百奪所掠人畜以還辛卯春虜約東西部謀大入先其未發合諸將兵出鎮虜臺掩擊之斬獲甚衆虜謀以寢在遼三年繕塞修城扞防之備甚設前後條議邊事以十數詔晉兵部右侍郎兼僉都御史總督薊遼無何晉右都御史入理戎政陞南京工部尙書尋改兵部叅贊機務以萬曆庚子卒于官得壽七十有一

杰夙負志槩始進盟心期不爲勢賄移兩使親藩餽遺一無所受按部關輔值歲大稔痛裁供億檄郡吏各以方略佐賑饑民用甦中璫採兎寶坻踐稼擾民疏陳其害罷去楊忠愍繼盛以擊相嵩死爲請建祠祀之得賜額曰旌忠出爲監司浙營兵以減餉譟羣擁撫臺吳公於軍中刃脇之杰聞變疾馳而前諭以利害悍卒斂戢吳公獲全無何杭民以火甲偏累控狀直指不得伸構惡少夜縱火燔掠公署及貴豪家一邑洶洶杰于兵燹中走衛直指而陰勒營卒捕爲亂者收繫獄明日僇其魁衆乃戢其鎮遼務遠斥堠

虜近塞輒先謀知其情部署諸將宿勁兵以待虜入  
互爲犄角動應指揮靡不以全收勝者遼之績蓋獨  
偉焉訃聞賜祭葬贈太子少保廕一子國子生

郭容

郭容字子仁大同渾源州人成化乙酉登鄉書屢試  
春官不售僑寓京師友天下士銳意樹功名其魁壘  
之氣鬱無所施則相與縱論天下事抵掌高談緩據  
古今出入經史霏霏如屑或論不合則面折之人雖  
不堪不少假盡言乃已然直諒素著人亦不甚怨焉  
癸卯夏天子召見便殿訪以黃白之術容謝不知



是歲冬除山東寧海知州單車以赴民有豪猾恣爲  
奸利前守莫能制鄉人畏戒縛而杖之餘黨解散州  
濱海陋無禮教婚嫁爭財女不時歸定爲條約赤貧  
者足帛罇酒官給焉每得亂吏治者俾輸本自贖民  
死不能葬者資以棺具養濟院布粟以時頒暇則按  
視問以疾苦嘗謂守令之責實兼教養於是條具利  
民化俗十有六事請於監司行之識者知其志非小  
就者也甲辰冬中貴人奉命祀海神因欲稅金以媚  
於上郡邑將從之容逆諸境上言境內往歲雖產麩  
金日漸微渺得之甚艱置稅則朝廷未必得分毫之

利而百姓受無窮之害况後課額不足又將取足於民或有他虞亦今日啓事者之責也或以餽金獻斥之復以危言動其左右之人中貴猶豫且心憚稅卒不行乙巳督餉宣府感暑疾還至京師寓舍卒得年五十有二

林椿

林椿字永年號南山大同衛人襲右衛指揮僉事尋擢把總統部衆遏敵斬獲賊首陞指揮使由此韜畧益聞聲望益著維意所向目無勁敵推陞右衛城守備甫歲值大廟灣之變身披重創不克視事乃乞休

尋愈守備朔州維時虜衆南下岢嵐係腹裏劇郡乃  
特選改其任至則極力經營百廢具修歸然壯於邊  
陲值夜分宴坐吏人懷金投帳下無語而出椿速招  
之入叱令持去旦日集諸吏白其事且誓之曰爲官  
暮夜受金爲貧耳比與爾爲軍輩貧且奈何哉由是  
無不感泣二十三年拜協守大同副總兵年纔三十  
餘壯懷忠志益肆激發每讀岳武穆詞至食肉飲血  
處憤惋嘆曰人臣懷仁義以事其君豈容旦夕忘此  
與人接談必以捐軀殉國自許居家遇祀事則齋戒  
獨宿臨事戒懼每用占卜尤精靈棋經稽驗不爽性

好修合醫藥歲每捐俸濟人多所全活凡軍中嬰疾者卽僕僕視脉施藥用是軍深德之管修塞垣與士卒同苦卽飲食莫之或辨防秋夜遇雨雪端坐營帳子姪輩或勸飲遣懷止之曰士衆且凍餒直衛吾尚敢他縱乎丁卯秋提兵右衛夢與賊戰叱咤之聲雖寤猶壯烈每提兵出必拜別老母若永訣意卒之前日虜勢劇寇邊猶衷甲將躍馬重與母氏叩首不覺泣下戀戀然意屬後事於子觀者駭異率寡弱至桃坡墩猝與賊遇自己至申鏖戰虜勢小却乃傳聞張總兵官羅所不虞頓足大聲誓不與賊俱生轉戰而

西維時賊衆併力四集重圍夾門矢盡勢孤遂爲流  
矢額傷卽氣微幾絕而目尚瞋裂齒尚咋切其潰賊  
合餘威懾襲猶交相駭愕而不敢近者久之

### 劉伏玘

劉伏玘大同衛軍舍也大同有叛卒王三者驍勇絕  
倫且多智諳嘗鼓衆殺主將竄投虜中初虜疑之謂  
必殺其妻子以示信遂歸鳩母及妻火其居爲不返  
計於是虜尊禮之俾統健卒鈔掠邊地庚子迫太原  
辛丑深入榆次以及文水岢石之間無歲不罹荼毒  
所至無敢觸其鋒者甲辰秋突入紫荆直抵完縣京

師戒嚴 天子震怒詔械督府鎮巡官而下論罪有  
差職方郎韓勛廷杖且死懸賞格能生捕致闕下者  
予千金官五級世襲玘向與三善兼有力技乃挺身  
而出曰戮此妖醜非伏玘不能留三子于家瞻養父  
母自携其妻女與所善三人毅然就道直抵關口以  
釀酒爲業居將一年三忽執戈佩纛單騎挾四小虜  
按轡關下問戍卒釀者爲誰卒指玘名以對速令趨  
會玘携壺榼出伏道傍三下馬執玘手曰弟何爲在  
此玘泣曰貧甚聊寓此糊朝夕耳曰我在第何憂貧  
富貴可立致也玘斂泣酌酒爲壽傾數盞欣然樂之

曰吾欲至爾旅舍玘辭陋陋不能爲款曲固請以行至其舍相勞苦備至且請見其妻女曰今日當與弟盡傾家釀以極醉爲期顧小虜出數金遺之其妻亦繆爲恭謹跽獻數巨觥而復出禮其小虜俾之盡醉日將夕三與小虜俱偃卧舍中數試之不覺玘乃與同事三卒以大椎椎其兩臂縛以巨繩載至總戎所覆覈無僞檻詣京師傳首九邊以懾諸虜完縣酋衆聞之星夜解圍而去加賞格予玘千金官正千戶同事三卒各百金官百戶邊患甫寧

補遺

孫逢吉

孫逢吉渾源人正統間鄉舉初知陝西延長縣擢御史所至肅然其在四川舉掩骼埋胔之典復清刑獄辯其數年冤抑者甘雨大注歷陞陝西布政使始終官陝歲四十年秦人熟習政教老穉知其姓名

宋經

宋經蔚州人父弼爲翰林庶吉士官至戶部員外郎經成化間進士任行人擢御史轉大理寺丞左遷安州知州居官剛正不阿以故貶子獻通判青州陞濟南同知廉勤公謹卒於官囊無寸蓄妻子幾不能存



李從正

李從正蔚州人成化中鄉舉任吏部司務歷陞禮部郎中出知九江府剛介明敏政教兼舉因自陳陞擢布政司叅政致仕民爲之立碑頌德

張汝舟

張汝舟渾源州人正德初由萬全經歷陞順天大城尹時劇賊劉六輩突至汝舟以孤力守危城悉力保障誓不與賊同生旣而賊大合來攻城陷巷戰而死其子策以護父并遇害事聞贈光祿寺寺丞廕一子入監

山西遼州

高 巍

高巍遼州人事母蕭至孝洪武十五年應貢入太學十七年以孝行旌尋授前軍督府試左斷事十八年上疏欲墾河南山東北平兵後荒田及抑末技慎選舉惜名器數事 上嘉納之後坐斷事不稱旨謫戍貴州關索嶺建文初知州王欽應詔辟巍赴銓曹上書論政事其一日 太祖分茅胙土先據形勢陝西百二山河其人悍勇西隣土番故以秦府王之山西表裏山河地產良馬其人剛壯北近胡虜故以晉府

王之燕國坦平肥沃貢賦饒衍雖沙漠不毛廣蓄馬  
羊其人不耕不蠶皮衣肉食弓馬是務遼金殘元籍  
之興業故以燕府王之四川雖曰西南一隅山河阻  
深玄德武侯虎視吳魏故以蜀府王之其餘楚湘齊  
兗谷代遼慶星羅棋布比之古制雖分封過當然莫  
不欲其護中國而屏四夷也今親王驕逸不法違犯  
朝制不削則紀綱不立削之則傷親親之恩以臣愚  
見莫聽晁錯削奪之策當下主父偃推恩之令秦晉  
燕蜀四府子弟分王於吳楚湘潭如是類比而分王  
之少其力而減其地賢如河間東平者下詔褒賞驕

逸不法如淮南濟北者初容之再赦之三則合諸親王告于太廟削其地而廢處之豈有不順服者哉疏上建文奇之會靖難兵起命從李景隆出師叅贊軍務魏復上書言臣願使燕曉以大義遂遣往燕魏自稱國朝處士臣某上書燕國大王其畧曰太祖升遐遺詔內外臣民同心輔政天子嗣位誕布維新之政朝野皆曰內有聖明君王外有骨肉藩翰帝王之治可待不意大王與朝廷有隙張皇三軍抗禦六師竟不知其意何出朝廷諸臣執言仗義以順討逆臣以爲謀動干戈孰若和解使帝者復帝王者復王君

臣之義大明骨肉之親愈厚釋猜忌之疑塞讒間之口慮不及此而欲效漢七國之謀家必自毀然後人毀之萬一奸雄豪傑因時乘釁率數萬衆突起而橫擊之萬一有失大王獲罪先帝矣今大王據北平取密雲下永平襲雄縣掩真定易若建瓴然自興兵以來經今數月尚不能出藪爾一隅之地較以天下十五而未有一焉大王將士殆亦疲矣天下無限之師大王以一國之衆應之計大王同心之士大約三十萬大王與我天子義則君臣親則骨肉尚生離間之疑況三十萬異姓之士可保終身困阨而死於殿下

乎卽幸而兵勝得成後世公論謂何倘有蹉跌取謫  
萬世於斯時也追復臣言其可得乎魏蒙 太祖教  
養無能補報洪武十七年旌表愚臣孝行臣竊自負  
旣爲孝子當爲忠臣死忠死孝臣至願也書上不報  
景隆兵敗魏自拔南歸建文二年遇鐵鉉於臨邑相  
持慟哭共誓效死遂趨濟南城守拒退靖難兵作賦  
志喜京師破魏縊死驛舍中

王雲鳳

王雲鳳字應韶居山西和順之虎谷因號焉父南京  
戶部尚書雲鳳成化癸卯鄉舉明年舉進士除禮部

主客司主事清忠効官獨立不懼足不躡公卿門不  
赴無名飲宴或訪其矯激不顧也成化弗豫禮部沿  
舊典舉薦鳳言于禮部尚書周洪範曰祈禱固  
臣子至情第行于佛老宮非禮若干壇于南郊隙地  
大臣率屬禱于天三日可也乃不克用弘治庚戌疏  
却貢獅子疏入得允天下傳爲盛事陞祠祭司員外  
郎尚書倪岳因災異倡府部院疏弊政用雲鳳四事  
草一懲邪惡二禁給度三停減齋醮四議處宗室言  
甚剴切陞郎中朝廷欲度僧乃疏列千餘言三上皆  
不報僧道通中貴者謀欲普度撼以危語不動命

下度僧不多而逃軍囚匠不與時人皆喜其有回天  
之力神樂觀道士多賄賂或姦盜教坊司或買良爲  
娼錦衣衛校尉獲賊又誣娼巧取其資漸以成風雲  
鳳皆疏題禁絕之又奏准天下郡縣皆立名宦鄉賢  
兩祠爲後人式竝祠薛文清於鄉而斥韓王徽鑾之  
道號禁吉府土木之科擾上皆嘉納由此知名丁  
巳京城風霾踰旬各處天鳴地震雲鳳陳修德弭災  
之道大意納忠言罷左道齋醮傳辦傳奉諸事上  
遂下詔求直言雲鳳又代部尚書及諸大臣條二  
十一事李廣表裏通惡人莫敢言雲鳳又獨上疏乞



斬廣泄神人憤以弭災變廣怒令道士設醮呪死術以舒恨乃令校尉數伺其出入月朔聖駕郊天看牲回誣以駕後騎馬下錦衣獄謫知河南陝州比至問民疾苦興利祛害惟恐後州城高阜井深二百尺民難於水乃勸通廣濟渠水入城民皆踴躍日受百狀皆與別白口訊手判仍應他務人以爲有劉穆之之風已未李廣漸疎於上懼誅飲毒死得陞陝西按察司僉事尋陞副使整飭洮河岷州邊備乃申孝弟革宿弊所按部賊污官吏有望風而遁者軍法嚴明邊卒悅畏條疏八事皆可常行復改提學正德丁

卯陞山東按察司使丁母憂歸服闋陞國子監祭酒  
始被命欲堅辭父大司徒公曰吾老矣汝置我何  
處死乎不得已泣而就道素見憎劉瑾至是復無所  
餽瑾怒欲中以禍竟不能得時國學教廢朝夕講說  
約束太嚴誹謗四出雲鳳欲更六堂名曰主敬窮理  
修身修道教諸生讀小書以上達瑾聞怒曰王雲鳳  
亂成法欲代邢讓死邪雲鳳以道不行怏怏求去會  
瑾下獄遂上疏乞養病御史楊邦禎等交薦其賢又閑  
通政復上疏乞養病御史楊邦禎等交薦其賢又閑  
於韜畧上命巡撫宣府地方又上疏以疾辭不允

乃上楊太宰書其畧云山中屢聞忠讜之言近者留  
王昂一疏尤爲人所傳頌未聞唐介初貶時潞公有  
此也執事於是加人一等矣然介雖貶未幾而復其  
殿中侍御史今王昂旣不獲還之青瑣則推薦超陞  
在執事筆端焉耳他日秉史筆者書此一行豈不足  
以照耀千古哉每恨李文達近稱賢相然惡羅倫淪  
落以死擯斥岳正坎珂終身極貪之陸布政反得超  
擢今文達之富貴安在哉一時快意可畧也前輩影  
樣之多後人是非之公可畏也一人私情可畧也天  
下指視之嚴史氏紀載之實可畏也一身極榮極富

極貴可畧也每日光陰之易過去者不可復補百年  
歲月之無多來者未必可追可畏也且用舍之間士  
風所繫扶持正人則善類慶而士風以振進獎邪人  
則善類沮而士風以頹唯鳳與執事可以此言進故  
不復忌諱況今兩耳皆聾調治不瘥只當耕田納稅  
爲畎畝之閑民養親讀書忘歲月之不貸豈有夢寐  
更著冠束帶耶伏望周旋其間以必得遁藏爲幸縱  
猿鹿於林莽之外投魚蝦於沮澤之中某未死之年  
皆執事之賜也稿傳京師人爭錄誦雲鳳再欲辭避  
尚書迫之行不獲已之鎮以便益從事將官犯法依

律重輕罰米至萬餘石用足軍食自叅將以下願指  
氣使莫或敢喘息練習軍士率有紀律日戒諭防衛  
如賊在目前虜不敢輕入北門鎖鑰時論歸之兩閩  
月丁父喪服闋除職如故清理浙江鹽法上疏乞致  
仕上不允准病痊起用雲鳳曰吾志遂矣遂歸不  
復出人士想見其丰采焉

王佐

王佐字廷輔和順縣人幼敏慧光祿君初丞譚城驛  
有中貴宿驛久人厭苦之佐夜密令人取庭樹巢鵲  
墨身朱喙而縱之中貴見而驚熟視之故鵲也詰諸

館人皆驚以爲不祥遂去之弱冠爲縣學生二十六  
舉鄉試成化戊戌登進士佐試政吏部太宰尹公嘉  
其器識數召與語兼容咨訪人才辛丑除文選主事尋  
丁外艱去甲辰服闋補考功司丁未當朝覲之期例  
覈天下諸司官博采輿論必求其當凡貪酷吏雖親  
故不曲庇貴勢請託一無所撓或本廉吏而爲毀者  
所中傷則力爲伸雪之遷驗封員外郎弘治庚戌進  
郎中有土官承襲例當覈覈屬一京宦餽白金若干  
祈免卻而逐之其人愧恚自是不復敢見太宰三原  
端毅王公知其亮直調考功司又值覲期黜貪濁斥

庸懦拒請託視前加嚴焉山西提學僉事楊文卿每憾佐不薦已比遷山東副使以公務至京見少宰曲陽周公謂之曰王郎中數稱君賢楊乃嘆服甲寅遷太常少卿提督四夷館尋丁內艱去服闋至京師留逾年不得調相知者諷以具禮幣往謁執政應曰諾實未嘗往又趣之行且令一隸施從所之明日過執政門不入而去相知者佯問曰執政云何曰執政意無他也因具言其狀爲之一笑改順天府丞轍下事繁動涉權要處之裕如乙丑遷光祿寺卿節縮供應所省甚多正德丙寅遷戶部右侍郎奉勅勸功臣

地主於常州丁卯轉左侍郎時劉瑾用事凡大臣科道使外還者皆有厚餽不然立見罪黜公獨無所餽瑾常語人曰世言山西人吝果然自是銜之屬時遣使稽覈各邊糧芻先後撫巡憲臣多坐累繫獄一日同尚書顧公輩見瑾瑾言及茲事曰朝廷必誅戮一逮人乃懼耳佐曰本朝未嘗輒戮大臣恐不可開端有毀吏部尚書許公進者瑾信之語諸大臣曰許某奸邪若某尚書可爲吏部佐曰某與某尚書素厚與許交淺然許素有時望某尚書恐不如毀許者因譖曰王某實黨進瑾益怒遂遷南京戶部尚書欲姑遣



之去而徐圖之耳比至南京以戶部廣東司失金幣冊建先尚書韓公輩詰問遂翻佐下詔獄以爲罪令致仕歸又中以他事罰粟千石歸家行李蕭然圖書數卷閉戶披閱子弟親識非有故不得見越四年卒性孤介寡合鄉鄰無當意者惟善李昂一人謂其有篤行娶其女爲子婦至白首恒念之在仕途所交不過數人所敬服者二三人而已慈惠逮下使人若恐傷之尤善記憶凡所涉歷終身不忘有文集數卷

山西澤州

楊砥

楊砥字大用澤州人洪武甲戌進士授行人司右司  
副上疏言漢楊雄仕莽爲大夫劇秦美新之論取譏  
萬世董仲舒三策及正諡明道之言足以扶翼世教  
今孔子廟從祀有雄而無仲舒臣愚以爲退雄進仲  
舒庶合萬世公論 太祖皇帝從之陞湖廣左叅議  
建文時遣李景隆等攻圍北平城砥上言帝堯之德  
始於親九族今當務惇睦不宜加兵自剪其附枝附  
枝盡而根本蹙矣爲齊黃輩所忌斥罷之 成祖卽  
位起爲鴻臚寺卿喪父廬墓側者三年服闋陞禮部  
左侍郎坐巡河渠失職降工部主事改禮部永樂十

年命簡閱北京郡縣馬陞太僕寺卿明年兼死馬寺卿砥率勵僚屬凡孳牧之法與民之利病悉條奏行之馬大蕃息母喪賜鈔千錠命護喪歸葬哀毀致病未至家而卒上悼惜之遣官致祭砥剛介勤敏居官有操守其孝行尤爲人所稱云

### 茹太素

茹太素澤州人洪武初由舉人除監察御史陞四川僉事改刑部主事因災異以五事上言甚多至萬餘字將罪之因察其言可行遂著建言格式累官刑部侍郎都察院都御史以事摘翰林院檢討尋陞戶部

尚書抗直不屈屢瀕於罪 太祖悉宥之一日宴便殿賜之酒曰金杯同汝飲白刃不相饒太素叩首曰臣一心思報國不避帝心焦 上惻然者久之尋以事降御史出爲江西叅議

張 昺

張昺澤州人國初舉人材建文時遷至禮部侍郎會諸藩不靖廷臣建議凡藩國所在悉更置守臣以素負重望者居之乃以昺爲北平左布政使比至潛察燕有異謀遂與都指揮謝貴以在城七衛及屯田軍士防守九門飛章奏聞有掾吏李友直者智譎人也

曷以腹心寄之友直乃竊其章密獻 成祖會朝廷  
遣內官建護衛官僚 成祖逼使召曷入至端禮門  
爲燕山副千戶譚淵所執曷與貴皆不屈而死曷得  
尸還葬 成祖登極其疎戚及同里人咸分遣戍邊  
後 上屢夢曷等披髮爲厲命出其屍焚而棄之曷  
面如生一子逃去不知所終洪熙改元詔曷戚屬戍  
邊者家籍一人餘縱之還里正德庚辰知州馬汝驥  
立祠祀之

侯璉

侯璉字廷玉澤州人永樂癸卯山西鄉試第一宣德

丁未進士爲行人以善辭令而剛果能斷得名四川雲南廣西諸土官有爭地累年不決者朝廷以命璉至則按圖考志召諸耆老開誠布公智力貨賂不可移由是皆服而罷 上以爲能交趾黎麟請命璉輔

禮部侍郎章敞往錫封至其境關門低且隘先驅者言當偃伏璉止之曰此中國所謂狗竇也於土人出入則宜今天命下臨不可由此度迂者驚懼爲撤關乃度由是蠻夷益謹禮不敢肆旣歸毫髮無所受人以此益賢之遷兵部主事虜寇阿台朵兒只伯犯邊與會川伯趙安尚書柴車等自梁州分兵出鐵門關

攻敗之與有勞績以外艱歸居憂盡禮而哀戚加焉  
服除陞郎中麓川思任發反詔尚書王驥帥師討之  
璉輔行往來督戰視將校用命不用命者定賞罰賊  
攻天侯州以偏帥往援令於衆曰吾視賊氣驕有輕  
我心宜掩其不備卽麾衆薄之呼聲動天地斬殺無  
算賊大潰我師益奮與叅將冉保等遂破石甸等十  
餘寨聞大將軍至麓川賊阻截不得通復與保等由  
高黎貢山晝夜兼程進與大將軍合擣其巢穴賊遂  
平凱旋陞禮部右侍郎賜白金鈔幣且賜誥命以寵  
之尋奉勅出鎮雲南得便宜從事雲南饑乃發倉

廩及募富民出粟以賑之全活甚衆會再討麓川餘  
黨璉引偏師由平崖南甸進破賊子思機發所居寨  
獲其妻孥輜畜捷聞陞左侍郎賜白金綵幣遷兵部  
左侍郎復鎮雲南騰衝城置軍衛焉時議以賊子思  
機發在孟養復命靖遠伯王驥以兵往勦之璉與都  
督張軌分軍抵金沙江造船先濟奪賊地爲營於是  
大軍畢渡燬其柵而進賊奪孟養度不可支各鳥獸  
散去窮追至孟糯海子等處不可得乃班師諸夷酋  
長皆驚駭曰古漢人無渡金沙江者今大將軍至此  
真天威也南夷無復反矣還鎮雲南 景皇帝卽位



遣使齎勅嘉勞賜白金綵幣值貴州饑苗叛攻圍新添諸衛道梗弗通城中食盡命總督軍務往征之時普定圍急乃自雲南選善射者爲前鋒自將至普定及戰矢下如雨賊大敗圍解遂趨貴州副總兵田禮等以兵來會克龍里甕城諸路新添平越等諸圍俱解由興隆而下抵鎮遠皆平定事聞上嘉其功陞兵部尚書又進克安莊西堡長官司時暑雨方盛瘴癘大作璉得疾昇普定醫弗效諸將問疾惟戒以勿輕此賊合整兵進勦無貽患生民未嘗一語及私時年五十有三上聞嗟悼遣官致祭命歸其柩於

澤州有司治墳以葬

### 楊繼宗

楊繼宗字承芳陽城縣人天順元年進士授刑部主事陞嘉興府知府九載秩滿超拜浙江按察使以母喪服闋起爲右僉都御史整飭薊州等處邊備兼巡撫順天等府爲治中陳翼訐奏左遷雲南按察司副使進湖廣按察使未幾復擢右僉都御史巡撫雲南卒訃聞遣官致祭宗廉介峭直人莫敢犯而爲政恒便於民其在刑部時憫獄囚多瘦死者每時其飲食令三日一櫛沐全活甚衆在嘉興惟有一蒼頭自隨

有富民懷姓者坐侵盜官絹繫獄御史張敷按臨日  
卽入獄點囚指問曰是無失主繼宗曰朝廷卽失主  
又曰無原告繼宗曰知府卽原告御史慙而退布按  
司官行部者事畢卽去不敢久畱其境旣去民懷其  
善政爲立去思碑在浙江憲度甚肅初藩臬諸司所  
用多取辦于民官鎮守者日費供億萬錢繼宗一切  
革去以憂解任時悉取廳舍中器物卽付有司篋中  
惟書數卷衣數件而已及爲都御史畿內多權貴庄  
田有侵占民間者奪而還之其風力如此歷官中外  
所至有聲其行事未免過當然節氣有足尚者晚年

望不無少減云

田鐸

田鐸字振之號西麓澤州人生而資稟英特成化戊子領山西鄉薦戊戌登進士授戶部主事陞員外郎中弘治二年四川饑奉勅督糧五萬往賑之事竣復命以誤遺勅中語調蓬州知州時方經賊前爲守者里設巡視鄉正與老人若機兵吏下鄉訶事名曰安民而實病之鐸下車一切罷去民用以安是歲六月不雨蒞政甫三日卽齋沐禱於社引咎自歸是日大雨如注遂以有年出奸吏六人民稱快而寇

盜猖獗甚至入州城行劫鐸設法緝獲巨盜又增築  
壘堞申嚴門禁盜遂屏絕州濱江溪民多病涉乃建  
大小二十四橋三溪山高而無路乃鑿里許爲途民  
無病涉者州東南江有洲八十餘頃居民樵採牧養  
所資豪右侵以爲業奪而復之民流他方遣人招懷  
諭以免役三年仍令恣耕山地不增糧額民復業者  
甚衆間取前賢行實切於藝倫者圖注懸旌善亭朔  
望令教讀聚童誦習以時講於州俾父老聽之監司  
行部訝無投牒者審知其然甚嗟重之每謁文廟畢  
必與諸生講論經史辨疑導滯通暢而後已廟廡傾

壞重爲修營務堅朴可久不事華飾在州八載吏畏  
民懷政聲彰徹都御史及御史薦章六上陞廣東僉  
憲在廣存大體略細故所治清遠廣海二衛弊以清  
革其爲政如此

張璉

張璉字伯純澤州人登弘治丙戌進士出知尉氏改  
宜陽課農興學旌良懲頑流亡者還健訟者息入內  
臺爲御史逆瑾銜其直罔以罪卒無驗止晉河南僉  
憲提督學政閹奴廖鵬陷之改陝西河外收糧都御  
史張甚貪而復璉與御史成文裁以法制某不堪誣

蟻於總制總制聞於朝有旨覈驗某卽實以 上再  
命官鞫之某大用賄下于詔獄凡三年臺臣數論列  
誣乃明是時內閣素嫉天下名士輕已翻右某坐以  
不遜除名嘉靖初起用屈滯值有讐者在當路沮之  
成公再起爲副都御史矣璉屏居山中讀書談道考  
訂古義得失自六經四書程朱氏外不屑師焉所著  
有程朱心印若干卷藏于家

王 珰

王珰字邦器號西溪澤州陽城人自幼聰穎過人一  
時儒者咸推讓之累試不售志益篤弘治戊午以書

經領山西鄉薦己未登進士丁父憂守制服除授戶部主事屢承差委臨清德州居庸通太等倉監督所至夙弊一清司農鄉鄆城侶公洪洞韓公咸以廉靜稱之丁卯母太安人卒于宦邸扶柩回葬服闋陞刑部員外郎中時逆瑾擅權專務苛比玠獨持正不阿法署咸以平恕明允稱之遷陝西僉憲已調河南分巡汝寧道值巨盜劉六等擁衆數萬雲擾中州逼近汝城人皆震懼玠力爲捍禦之計集衆誓曰賊勢雖熾逆天必亡不足懼也我奉命守城死生禍福與爾輩共之衆心始定因密疏具奏遣將命師互相犄角



屢致克捷廉知賊黨趙秀爲汝人其母久禁獄中立  
釋糈養之秀感泣圖報適賊首趙璠與劉六等會兵  
秀急報玦督率部兵追襲一舍地殲之時紀功者招  
權納賄玦不爲禮大銜之悉削其功不錄事平僅蒙  
鎡金文綺之賜循資陞山東副使備兵密雲永平等  
處薊州歲稔出廩粟賑之濟活甚衆時虜寇把兒孫  
犯邊殺傷叅將等官抄掠甚毒同撫鎮率兵討平之  
再賜鎡幣進山東叅政時海西夷人進貢道經開原  
守將誣執爲盜以撲殺報功 天子遣官按 玦承  
勘據實回奏撫鎮俱得罪而玦亦因以犯衆忌矣遂

解組以歸享年七十有五而卒

孟陽

孟陽字子乾右僉都御史公春子也世爲澤之太陽人領正德丁卯鄉薦第三甲戌舉進士授行人司行人恒欲以名節自表初使宣府犒軍卽與監督軍務中官抗禮中官不敢忤而禮益恭比行總鎮餽遺一無所取再使韓府亦卻其餽王乃製詩卷贈之爲行人凡四載不遷或欲一見當道不宜坐自淹沮者謾應之退而私自語曰君子立身當如白玉少有瑕玷終身之恥吾豈以官而易吾身邪且行人清秩何必

科道哉正德己卯春 毅皇帝北巡榆林回命下復  
南巡人情騰沸臺省部院等官咸有言不報陽慘然  
與諸寮友一十九人抗疏極諫歷數權姦欺君誤國  
之罪疏入 毅皇帝震怒命杖之午門權姦監之知  
必死仰天嘆曰嗟乎天乎吾得死所矣越一日卒于  
京邸距其生僅三十有四卒之日諸親友候之有問  
者但言曰當死當死殊無一言及家事平居孝友謙  
抑若無知者遇事則萬夫莫奪嘗與其父議有不合  
輒諍之既悟則跪膝前謝罪幼爲祖母鍾愛後乃迎  
養京邸比祖母卒哀毀骨立尤嚴于好惡區別淑慝

不少假明年辛巳 毅皇帝升遐 世宗入嗣大統  
首詔贈監察御史錄其子一人爲太學生

郭 鋈

郭鋈字允重號一泉高平人正德己卯甫弱冠以春  
秋魁三晉同學燁然聲動士林嘉靖壬辰復以春秋  
魁天下文出四方士爭傳誦之授行人奉使韓府舉  
循規制乙未選工科給事中歷禮科刑科左右給事  
中己亥陞戶科都給事中悉心効忠累疏建白不如  
不激切中時艱常遴簡扈 聖母梓宮塋顯陵都御  
史怠緩卽論劾罷之復命 上嘉賞賜內緞錦綺無

何工部尚書有講張者抗疏論其舉人咸爲懼已得  
俞旨落尚書職念天下戶口徒存版籍殊耗實數欲  
重邦本宜行攢造法章入 上是其言行之嘗語人  
曰言官貴識大體糾官邪先急要可也若恣已意摘  
人細隱煩更張吾弗爲矣用是朝端推服一時公議  
歸之壬寅陟太常少卿提督四夷館館舍久圯捐俸  
葺之豎題名石率教師訓譯生勤習藝業法令大行  
會丁母憂陳情蒙諭祭戊申制闕復任四品三載考  
績已酉擢南光祿卿尋轉京兆尹時胡虜犯近郊都  
城戒嚴下令堅壁清野慎加防禦畿輔以安庚戌進

南大廷尉明年召還棘寺明飭法律雖忤權璫弗顧  
壬子陞工部右侍郎奉勅總理盧溝橋是歲以三  
品考最進階通議大夫賜恩三世廕一子入太學甲  
寅轉左侍郎督修京師外城籌畫先勞務圖堅久而  
材力一無靡費工竣加尚書俸丙辰奉旨致仕邑  
志缺有司請纂修則加意攷正二三閱月志成爲園  
于南郭與親黨賢士大夫遊詠爲文雄健精暢深得  
左氏體詩有唐韋劉超曠之趣著作多散逸有一泉  
稿藏于家年六十有六

郭 鑒

郭鑒字允新號三泉高平人嘉靖辛卯薦于鄉乙未  
舉進士是年上親賜諸進士及第復御文華試選  
二十八人讀書中秘鑒被選益肆力于學望日起辛  
丑授檢討尋丁父憂起考九年滿陞修撰己丑奉  
命修大明會典壬寅陞司經局洗馬兼修撰丙辰陞  
國子監祭酒丁巳陞南京工部右侍郎戊戌春分考  
會試壬子秋上命偕宮允尹公主應天試論者咸  
稱得人任祭酒端模範飾訓典本經術造士而尤以  
德行爲先故一時及門之士彬彬循循習爲一變待  
人恕而自檢實密日勞公務夜分校文執以是瘳疾

作會又值其女喪鬱鬱不自平竟卒距生得年六十  
上聞爲遣祭縉紳士無不悼惜者作文有典則詩沉  
着自成一家類其爲人有翰林詩稿國學文集家居  
集若干卷藏于家

### 游居敬

游居敬字行簡號可齋世居高平登嘉靖壬辰進士  
選庶吉士讀中秘書改授監察御史以澄清自任不  
爲嬖姦巡視蘆溝清商人匿稅語侵司農竦然見憚  
巡按應天墨吏望風解綬徼有疑獄屢歲不決燭而  
釋之有池守執政姻也倚勢爲奸利廉其贓劾去之



戊戌出爲浙江僉事精覈吏治畫民便利事禁湖游  
戢戒壇杭俗爲之一變辛丑擢廣東副使歲饑設法  
賑貸民賴以活者甚衆晉叅楚藩適有事安南從中  
調度咸得機宜撫督重臣嘉之遂晉浙長憲已酉鄉  
試多得士旋丁內艱服闋復補浙藩時倭寇猖獗征  
調主客兵以數萬計事起倉卒庫無贏餘軍需皆倚  
辦焉經畫無後期議者欲練土著沃客兵客兵鼓噪  
當事者莫知所爲徐以數語諭之噪者還拜解散李  
太宰眷屬過浙衆爭致款第以常禮待之太宰謂疎  
已三年不調以外艱歸庫內羨餘悉上之撫院充餉

毫釐無染及闕起補山東戊午鄉試總裁校士無何  
奉 璽書巡撫雲南時鎮守沐朝弼方以奪嫡事爲  
其寡嫂陳氏訴訟朝命屢下切責對狀朝弼負固賄  
遺執政者益狡焉侵奪所屬民田以自封乃以分義  
裁之歸其所侵騰越州莊田朝弼陽順而陰銜之切  
骨東川逆酋阿堂謀篡東川強奪府印擅立作亂奔  
烏撒致與宣尉安萬銓霑益州土官安九鼎治兵相  
攻十餘年不解也至是侵及羅雄州逼危會城奮袂  
起曰堂堂 天朝寧容此么麼弄兵震動我三省芟  
夷我農工傾覆我疆邑無休息時耶上疏請誅之下

三省會議撫勦從便宜第事屬各省多首鼠多方招  
之不服乃乘其不意督兵進勦阿堂就戮三省以平  
會南京戶部缺侍郎推補而朝弼以歸騰越州莊田  
衙之謬謂輶軒使曰阿堂事奉 旨會勘十餘年柰  
何游某專征之且宴然以軍門自處擅興師旅一切  
兵餉不關鎮臣其如祖宗二百年職業何因與部使  
交構共謀以輕舉大衆蹈不測以徼必不可成之功  
疏奏遂被逮時金吾使者逮于行間離會城五百餘  
里次子於廣年甫十六自以年踰志學父以忠直被  
逮既鮮臧獲豈忍父獨行毅然冒寒凍侵霧露奔走

太宗以峻嶺間晝夜馳驅三百餘里且馳且餓旬日  
雖遠旅於普安驛相會淚涔涔頭不能自禁也抵京  
備嘗苦楚受謫籍杖下獄成碣石前奉定虜功悉爲  
部使所抑不錄會穆宗改元赦歸宣詔求遺逸  
詔起南原刑部有侍郎尋改爲刑部左侍郎適太學  
士高再起欲甘心于華亭徐公凡見彈劾者一網去  
趙乃語其所善曰相君必不忌華亭暨所嘗抵牾非  
計也僕爲相君姑舍是而一心以謀宗社異日誦相  
業媲美伊周善孰大者同官以告恣睢甚嗾其門生  
曰而無能爲若人除黨吾不能一日容也竟以年老

論致仕歸越四月卒建議重之遣官諭祭營葬如故  
事性狷介雖百折不回學務邇其先世言必歸實踐  
居身攻苦茹淡居家泊如日一食猶糲也一衣猶敝  
也一蓆其年漆枕櫛匣皆青衿時物雖貴不易也按  
江南疏去驕擾傳食者而辟除之又捕奸黨王冠賓  
於漕敷歷各省所至不軌法豪猾屏息滇南一整旅  
平十餘年之叛逆匪此舉三省不得寧也使他臣而  
有此伐當受延賞之典不錄也爾而獲罪在戍貧窶  
獄從者莫能堪有以居間請者叱曰我爲清白吏今  
醜首矣卽饑死瘴鄉不失清白鬼也其刻厲如此日

劉虞夔

劉虞夔別號和宇澤州高平人年十六魁省闈弱冠  
登辛未進士選讀中秘書詩若文力追古作兩擅其  
長癸酉授翰林編修明年使秦藩尋充大明會典纂  
修官教習內書館壬午考九載績轉侍讀是歲分纂  
起居章奏兼理誥勅踰年充經筵講官丙戌擢左春  
坊左諭德兼翰林院侍讀掌坊事己簡充日講官兼  
清武職黃會典成晉左庶子兼侍讀戊子以太常寺  
少卿兼翰林院侍讀學士掌院事明年晉詹事府詹  
事兼經筵日講忽母安人之訃至一號幾絕已彊起

具疏言臣不孝死罪臣母就木而臣不及視含殮也  
歸何以見臣父惟 上哀憐之俾臣得徼恩於母而  
請罪於父以僇於宗死且不憾 上特允之詔封父  
官母贈淑人予之祭葬服除詔起正史副總裁忌者  
摭浮言中之是時父春秋高以得侍左右爲幸無幾  
丁父艱扶病號踊益毀瘠不勝喪竟委頓苦次卒距  
其生年僅四十有五天性恭謹又自以英齡擢上第  
驟踐清華宜求不負其職益務挹損遂遂有以自下  
遇詞林先達於朝偃僂却立牽其臂乃肯前與之揖  
磨折欲盡與之語呐然若不出諸口也朝下蹙蹙策

馬歸鍵一室攤書盈几搜奇抉隱率夜分始就寢發  
爲文章泉溢盆涌而彌好深湛之思其典制必考義  
選詞字雕句琢無片語不工麗乃已自餘應酬諸作  
徵文者填戶亦必遲之累旬月躊躇滿志而後出之  
卽一尺蹠非再四點竄不發也侍上講幄依經演  
義就事陳規每蘄於感悟嘗說詩夜如何章反覆發  
明人主憂勤之念上爲動容嘉其稱職庚辰癸未  
再分校禮闈士鑒別精審雖退然若不勝衣而外飭  
中凝卓有定執非其義一然諾不肯輕一色笑不肯  
苟一造謁不肯失足也尤嚴取於官邸資用常仰給



家儲諸問饋常儀槩謝弗內內之報必倍人以是盡  
諒其廉掌詹時儲議未決奮袂起曰茲寧異人任乎  
趣草疏勸上蚤定大計不報比廬居議益譁復草  
一疏馳奏當塗阻之遂不果上草今藏于家曰漆室  
葵忱云

常倫

常倫字明卿沁水人父賜陝西按察司副使倫生而  
狀貌瓌奇七歲能文其語恠譎下筆輒滿紙舉進士  
授大理評事志氣傲鷺凌駕儕輩大爲時所仇疾被  
州判官又大爲監司凌虐棄官歸轉寧羗州

知州不起家居是馬馳騁學射射輒中的學畫學詞  
學字作校正字法一編然皆不逮詩而小詞獨盛傳  
澤沁間甚羣被之管絃久亦不廢曰常評事詞也每  
耽意聲妓有妓則酣唱大酌或累日夕不醉而作詩  
警敏則又若搆會彌日者嘗曰豈有旋翻故紙而後  
文乎人或謂倫寡讀書而益勝自負倫家居已久忽  
欲入京補官道經潞安晨起不告人跨生馬出馳城  
南馬渴赴水倫墮水死無知戚在側者時年三十有  
七竟無後人咸爲惜之倫性磊宕耻言家計自入仕  
至罷不以俸貲自入田隴所取寄之諸叔姪爲出納

且喜談仙曰仙人好樓居因號樓居子燒煉黃白無  
驗家益貧旣歿朝邑韓莊洛邦奇時爲山西按察副  
使爲經紀其喪歸葬沁州而開州王溱哀梓其稿河  
中劉成德撰表其墓溱與成德皆倫友俱有時名云

劉東星

劉東星字子明號晉川沁水人隆慶戊辰進士選庶  
吉士讀書內館庚午改授兵科給事中時新鄭復相  
宵人附麗政多失平將偕同官露章彈之或泄其語  
相懼因請大汰言官謫蒲城丞久之徙知盧氏萬曆  
改元召爲刑部主事署中有所比讞不當其事爲力

白其寃司寇以獄有左驗何據而出東星曰雖有左  
驗情實未明亦何據而當之死司寇竟傳爰書磔死  
已而事曰司寇及他郎皆奉譙旨鑄官而東星名藉  
藉起矣陞河南僉事轉陝西叅議以學行推浙江提  
學副使公于秉衡嚴絕干謁而評隲進斥之間不肯  
不濫人稱得體壬午移山東叅政丁內艱歸起補河  
南旋進山東按察使歷湖廣左右布政壬辰拜右僉  
都御史巡撫保定其時倭寇朝鮮王師出討宿重兵  
于天津羽書狎至歲又大侵東星外畫東征便宜內  
理荒政條上改折蠲停差次又請臨德漕粟數十萬

斛立法平糴官不失直而民贍給是歲也西輔饑而不害博陵盜起聚且千人吏請發兵勦捕東星曰此潢池弄兵可尺檄下耳殲其魁若干餘貫不問乃解散已轉左副都御史尋遷吏部右侍郎以清正廉平佐其臺長政本肅然丁父艱歸戊戌河決單之黃堠運道告堙適服除卽家拜工部尚書兼右僉都御史并河漕之政總馬蒞淮行河請濬趙渠故道明年告成任一千官生庚子渠邵伯之湖明年辛丑議開泇河以病卒于濟年六十有四病而詠曰人能常清淨萬物悉皈依靜泊不亂衣穢晏如冥然而逝

王璉補

王璉高平人宣德舉人爲京師南城兵馬繼爲陝西苑馬監正統九年書最陞太僕寺丞以勤恪著又九年致仕歸初在兵馬時連丁二艱凡六年廬於墓側不如域市有司奏請詔旌表之學士劉定之有序父起孝亦嘗以孝行蒙旌表君子謂璉之賢有所自云

原傑

原傑陽城人正統進士初任御史按江西俗素健訟經其斷者罔不帖服以薦超擢按察使剔宿弊興廢政扶善良鋤貪暴列郡肅然陞山東左布政使寬而

有制深得方岳體後進副都御史巡撫山東賑饑招  
下甚有惠政陞戶部侍郎勅往河南考察官吏首  
黜不職輿情稱快荆襄之亂海內洶洶傑奉命往  
諭以恩信兵不血刃而大難甫平且建設州衛處分  
田糧公私俱便俾數千年中原心腹之患一旦祛却  
功亦偉矣

宋 甫

宋甫澤州人領成化甲午鄉舉天性至孝清修苦節  
居父喪築廬哀思三載如一日感芝草瑞鳥之異有  
司奏聞旌表弘治間知忠州幾九載政教兼舉民有

思焉

常軌

常軌沁水人成化間進士授大理寺評事陟右寺副  
讞獄多所平反陞河南僉事行部至密縣有平民被  
拷自誣伏爲盜者至西平及裕州有鄉曲豪民爲公  
私巨蠹者他官避嫌且怵於勢莫敢問軌乃置盜之  
寃正豪之罪而一道肅然無何卒於官篋無餘資諸  
孤權厝其柩於汴者四年始克歸葬於沁

宋鑑

宋鑑陽城人成化間進士少有大志精力過人讀書



通宵不寐人謂之宋鐵眼初尹舞陽剛廉嚴正吏民  
膽落尤加意學校尋擢御史執法不避權勢出守廬  
州除大奸去宿弊法不徇人斷不留獄每行州縣日  
孜孜焉問民疾苦而刻剔之在任七年治績爲天下  
最性尤孝友常與弟同寢食視姪猶子鄉評重之

### 吳 茂

吳茂陽城人天性孝友母死水漿不入口者三日廬  
于墓所食粥啖葢繼絕鹽醋土厚苦無水掘地得泉  
水湧盈尺母性嗜瓜種於廬側二蒂並生人以爲孝  
感所致楊繼宗詩曰地湧一泉呈孝至瓜生二蒂著

心淳復爲序以紀之

李振民

李振民高平人有孝行父卒哀痛幾絕旣葬結廬墓側朝夕奠不甘滋味不衣絮帛會早霜秋禾盡枯惟周遭四十餘畝不爲災有一莖雙穗者人以爲孝感所致事聞成化間旌表

張黻

張黻陽城人成化間進士初尹靈壽清直簡默終日不見言笑色及臨事正法無一毫假借於人擢御史按陝西後陞副使卒于官所至皆以清白見稱

王翔鳳

王翔鳳澤州沁水人由鄉薦知臨安縣廉而有爲剛而不劇積歲逋稅甚多乃寬爲期限不以胥役擾之民相戒畢輸無後期者豪猾素持官吏短長至是咸屏迹焉崇重文治鼎新廟學歷官數官清介不汙後偶以冤獄力白當道數請不從竟投劾而去

段豸

段豸澤州人弘治壬戌進士由御史出宰棗強時流賊攻城戰死加贈太常寺少卿

申良

申良高平人由舉人弘治末授山東招遠令抗巨寇以全孤城訓士重農荒田墾闢者萬畝丁憂補良鄉力拒權貴之侵暴民力賴以稍蘇歷常州府同知以廉敏著尋陞戶部員外郎

張銓

張銓號見平澤州泌水縣人登萬曆甲辰進士授保定府推官能聲藉甚拜監察御史振肅風裁議論屹然中立無所依着出按江西聞虜騎充斥遼左漸危疏上方畧甚悉當事重其才改遼東巡按履任未幾遼陽失守虜薄城下猶勤兵督戰而賊竟以內應入

城群虜擁銓見其長銓挺立不爲屈賊迫之降銓大罵曰我豈降賊者耶何不速殺我賊猶憚之不敢加刃仍用輿擁至院署銓南向再拜自刎而死忠烈不忝古名臣矣